

***Uunga siunnersuut: Kalaallit Nunaata Aatsitassarsiornermi Aningaasaateqarfia pillugu  
Inatsisartut inatsisaata allanngortinnissaa pillugu Inatsisartut inatsisaat nr. xx, yy. 2015-***

***imeersoq (§ 50-imi atuutilernissaanut piumasqaatit allanngornerat)***

(Aningaasaqarnermut Aatsitassanullu Naalakkersuisumit saqqummiunneqartoq)

## **pillugu**

### **Aatsitassanut Ataatsimiititaliap**

### **ISUMALIUTISSISSIONAA**

### **Siunnersuutip aappassaneerneqarnerani saqqummiunneqartoq**

Aatsitassanut Ataatsimiititaliaq suliarinninnermini ukuninnga inuttaqarpoq:

Jens Erik Kierkegaard	Siumut	siulittaasoq
Juliane Henningsen	Inuit Ataqatigiit	siulittaasup tullia
Múte Bourup Egede	Inuit Ataqatigiit	siulittaasup tullia
Ineqi Kielsen	Siumut	
Sivert K. Heilmann	Atassut	
Naaja Nathanielsen	Inuit Ataqatigiit	
Agathe Fontain, sinniisoq	Inuit Ataqatigiit	
Kalistat Lund	Inuit Ataqatigiit	
Randi V. Evaldsen	Demokraatit	
Poul Hansen	Demokraatit	

Ulloq 15. oktober siullermeerinninnerup kingorna ataatsimiititaliap siunnersuut misissorpaa.

### **1. Siunnersuutip imarisaa siunertaalu**

Inatsisissatut siunnersuutip, ilaatigut atuuttuulersitsinissamut aalajangersakkat allanngorneqarnissaannik imaqartup ilaatigullu pigisat nalillit tigussaasut aatsitassarsiornermi aningaasaateqarfip isertitassaanut tunngavissatut ilanngullugit naatsorsorneqannginnissaannik aalajangersaasup ilaatut inatsisissatut siunnersuut saqqummiunneqartoq 2014-imi upernaakkut ataatsimiinnermi saqqummiunneqappaarlunilu siullermeerneqappaarpoq. Inatsisissatut siunnersuummi matumanit atuuttuulersitsinissamut aalajangersakkat allanngortinneqarneri kisimik pineqarput.

Atuuttuulersitsinissamulli aalajangersakkat allannguutissaat aappassaaneerneqangillat, suliarinninnissaq 2014-imi ukiakkut ataatsimiinnermut kinguartinnejarmat. Inatsisissatut siunnersuut qinersinissamik nalunaaruteqartoqarnera pissutigalugu atorunnaarsinneqarpoq.

Inatsisip aaqqissugaanerani allannguutit saniatigut, § 50-imi atuuttuulersitsinissamut aalajangersakkat allanngortinneqarnissaat siunnersuutip imarai. Aatsitassarsiornermi Aningaasaateqarfik pilersinneqassappat Nunatta Karsiata naatsorsuutai ukiuni tulleriinni marlunni 10 mio. kr.-inik isertitaqarfiusut minnerpaamik akuerineqarsimanissaat siunnersuutikkut qulakkeerneqarpoq.

## **2. Siunnersuutip Inatsisartunit siullermeerneqarnera**

Ataatsimiitaliamit aallarniutigalugu oqaatigineqarsinnaavoq siunnersuut Inatsisartunit tapersorsorluarneqarmat. Tamanna ataatsimiitaliamit tusaatissatut tiguneqarpoq, taamatullu ataatsimut isigalugu isumaqatigiittoqarnera tunngavigalugu isumaliutissiisummik naatsumik saqqummiussissalluni.

Ikinnerussuteqartut Inuit Ataqatigiit aatsitassarsiornermi aningaasaateqarfik pillugu inatsimmik iluarsiinerup annikitsukkuutaanik pinnani ataatsimoortumik pisariaqarneranik tusarniaaffigisat arlallit oqarnerat isumaqatigaat. Taamaattumik Naalakkersuisut siunnersuutaat kinguartinneqassasoq, tamatumunngalu taarsiullugu allannguutissatut siunnersuutit Inatsisartunit akuersissutigineqartut ilanngullugit inatsimmik ataatsimoortumik saqqummiussisoqassasoq siunnersuutigaat. Tamatuma peqatigisaanik inatsisissatut siunnersuut inaarutaasup Aningaasaqarnermut Siunnersuisoqatigiinnit oqaaseqaateqarfigineqartariaqarneranik tusarniaaffigineqartut arlallit oqaatigisaat Inuit Ataqatigiinnit isumaqatigineqarpoq. Tamanna tunngavigalugu Inuit Ataqatigiit siunnersuut taanna itigartippaat aammalu allannguutit akuersissutigineqartut tamaasa ilanngullugit ataatsimoortumik saqqummiussisoqarnissaata utaqqimaarnissaa kissaatigalugu.

## **4. Ataatsimiitaliap siunnersuummik suliarinninnera**

Siunnersuut siullermeerneqarmat inatsisissatut siunnersuut tapersorsorluarneqartoq ataatsimiitaliap paasivaa.

Ataatsimiitaliap aallarniutitut innersuussutigissavaa Aningaasaqarnermut Akileraartarnermullu Ataatsimiitaliap immikkoortunut UKA2015/120/121/122-nut isumaliutissiisuttaa, tassani sammisaq pineqartoq pillugu siunnersuutit siusinnerusukkut saqqummiunneqartut sukumiisumik nassuaatigineqarlutik.

Aammattaaq immikkoortunut UKA2015/120/121/122-nut 8. oktober 2015-imi akuersissutigineqartunut Aningaasaqarnermut Akileraartarnermullu Ataatsimiitaliap isumaliutissiisuttaa ataatsimiitaliamit innersuussutigineqarpoq, tassanilu ataatsimiitaliap kaammattutigaa:

”- Naalakkersuisut ilaatigut Aningaasaqarnermut Siunnersuisoqatigiinnik oqaloqateqarnissaat, taamaaliornikkut aningaasaateqarfimmit tunniussisinnaanissat aningaasaliinissamullu periarfissat eqaatsuunissaasa aammalu aningaasaqarnikkut ungasissumut isigaluni

attanneqarsinnaasumik iliuuseqarnissap akornanni oqimaaqatigiissitsinissaq naleqquttoq anguniarlugu ajornanngippat oqaasertaliinissaq qulakkeerneqarsinnaaqquullugu. Nalilinnit nunatta ataaniittunit iluanaarutit ilaannik naleqquttumik annertussusilinnik kinguaariit aggersut aamma pissarsinissamut qulakkeerunneqarnissaat aningaasaateqarfip maleruagassatigut tunngavigisaani naammattumik annertussusilimmik aamma ilanngunneqartariaqarpoq. Naggasiullugu ataatsimiititaliamit naatsorsuutigineqarpoq Naalakkersuisut UKA 2016-imi allannguutissaatut siunnersummik saqqummiussileraernerat kinguarsarneqassanngitsoq. Tamatumani minnerunngitsumik aatsitassarsiornermik suliniutit arlallit piariilernerat eqqarsaatigalugu, taamaalillunilu piffissap qaninnerup ingerlanerani aatsitassarsiornermit ingerlaavartumik isertitaqarnissaq ilimagineqarsinnaalluni.”

Immikkoortoq 121 ilusimisut iluseqartoq akuerineqassasoq Aningaasaqarnermut Akileraartarnermullu Ataatsimiititaliamit isumaqatigiittumit inassutigineqarpoq aammalu Inatsisartunit 8. oktober 2015-imi akuersissutigineqarluni. Taamaalilluni Aatsitassarsiornermi Aningaasaateqarfimmut allannguutissatut siunnersuuteqaqqullugit Naalakkersuisut peqquneqarnissaannik aalajangiiffigisassatut siunnersummik Inatsisartut akuersissuteqarnerat inatsisissatut siunnersuutikkut matumuunakkut malinneqarpoq.

#### **4.1 Inatsisissatut siunnersuutip taasissutissartaanut allannguutissatut siunnersuuteqarnissamut kaammattuut.**

Inatsisissatut siunnersuutip aappassaaneerneqarnissaanut allannguutissatut siunnersummik saqqummiusseqquullugit Naalakkersuisut Aatsitassanut Ataatsimiititaliamit isumaqatigiittumit kaammattorneqarput, taamaalilluni inatsisissatut siunnersuutip taasissutissartaata kalaallisua danskisuualu imminnut naapertuuttunngorsinnaaqquullugit.

Inatsisissatut siunnersuutip kalaallisuuata taasissutissartaa kukkuneqartoq ataatsimiititaliap inatsisissatut siunnersummik suliarinninnermini paasivaa. Naalakkersuisut tamatumunnga allannguutissatut siunnersummik nassiusseqquullugit ataatsimiititaliamit qinnuigineqarput, taamaalilluni taasissutissaq ima iluarsineqaqqullugu:

Uunga siunnersuut: Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata allanngortinneqarnera pillugu Inatsisartut inatsisaat nr. xx,yy. 2015-imeersoq.

#### **5. Siunnersuutip aningaasaqarnikkut kingunerisassai**

Siunnersuuteqartup aalajangiiffigisassatut siunnersummini aningaasaqarnikkut kingunerisassat pillugit nassuiaatigisaasa saniatigut allatut naliliinissaminut ataatsimiititaliaq tunngavissaqarsorinngilaq.

## 6. Ataatsimiititaliap inassuteqaataa

**Ataatsimiititaliami ikinnerussuteqartut** Inuit Ataqatigiit siunnersuut pillugu ima oqaaseqarumapput:

Inuit Ataqatigiit siunnersuut naammagisimaarpaat. Siunnersummut Inatsisartut ataatsimiinneranni siusinnerusukkut Inuit Ataqatigiinnit saqqummiunneqartumut taanna naapertuuppoq. Aatsitassanulli Aningaasaaseqarfíup ataatsimoortumik allanngortinnejarnissaq pinnagu immikkoortukkuutaartumik allannguisarnissaq amerlanerussuteqartut orniginartinnerummassuk uggorigatsigu oqaatigissavarput. Aatsitassanullu Aningaasaateqarfímmi sinaakkutissatut atugassarititaasut sukaternejarnissaat Inatsisartunit akuerineqarmat naammagisimaarpaat aammalu allannguutissatut siunnersuutit sinneruttut 2016-imi ukiakkut ataatsimiinnermi Naalakkersuisunit saqqummiunneqarnissaat qilanaaralutigu. Tamanna tunngavigalugu siunnersuut akuersaarlugu Inuit Ataqatigiinnit taasilersaarpugut.

Isumaliutissiissummi saqqummiunneqartunik oqaaseqaateqarluni **ataatsimiititaliap isumaqatigiittup** inatsisissatut siunnersuut **akuerineqassasoq** inassutiga.

Taama naatsumik oqaaseqaateqarluni isumaliutissiissummilu allassimasut paasinnilluni ataatsimiititaliap siunnersuut aappassaaniigassanngortippaa.

---

Jens Erik Kierkegaard

Siulittaasoq

---

Múte Bourup Egede

---

Ineqi Kielsen

---

Naaja H. Nathanielsen

---

Kalistat Lund

---

Sivert K. Heilmann

---

Poul Hansen